

**Ujaqqanik pinneraasiassanik nunatsinneersuunerannik uppersarsaammik allagartalersuinermik pilersitsillutik atuutitsilernissaannik Naalakkersuisut peqquneqarnissaannik inatsisartut aaliangiiffigisassaattut siunnersuut. Tunngavineqassalluni ujaqqat pinneraasiassat nunatsinneersut ujaqqallu qiperukkat nunatsinneersut pillugit uppersarsaammik allagartaliisarneq pillugu nalunaarussiaq juni 2017-meersoq.**

(Inatsisartunut ilaasortaq Peter Olesen, Inuit Ataqatigiit)

### **Akissuteqaat**

(Aatsitassanut Suliffeqarnermullu Naalakkersuisoq)

### **Aappassaanneerineq**

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq siunnersuut sukumiisumik suliarimmagu qutsavigaara. Taamatuttaaq *”Ujaqqat nunatsinneersut pinneraasiat ujaqqallu nunatsinneersut qiperukkat pillugit uppersarsaammik allagartaliisarneq pillugu nalunaarussiaq”* sukumiisumik Ataatsimiititaliami sammineqarneranut qujavunga.

Inuussutissarsiornermut Aatsitassanullu Ataatsimiititaliap isumaliutissiissutaa malillugu Ataatsimiititaliap isumaqatigiittup inassutigaa:

*”Ujaqqanik pinneraasiassanik nunatsinneersuunerannik uppersarsaammik allagartalersuinermik nammineq piumassuseq naapertorlugu atorneqarsinnaasumik pilersitsillutik atuutitsilernissaannik Naalakkersuisut peqquneqarnissaannik inatsisartut aaliangiiffigisassaattut siunnersuut. Tunngavineqassalluni ”Ujaqqat nunatsinneersut pinneraasiat ujaqqallu nunatsinneersut qiperukkat pillugit uppersarsaammik allagartaliisarneq pillugu nalunaarussiaq” juni 2017-meersoq”*

Ataatsimiititaliap allanguutissatut siunnersuutaa akuerineqassasoq Naalakkersuisut inassutigaa, tassami Naalakkersuisut Kalaallit Nunaanni ujaqqanut pinneraasiassanut nammineq kajumissutsimik uppersarsaammik allagartaliisarnermik aqqissuussinermik pilersitsinissaat, Ataatsimiititaliap isumaqatigiittup nassuiaat 2017-imeersoq tunngavigalugu kissaatigimmagu. Naalakkersuisut oqaatigissavaat nassuiaammi 2017-imeersumi nammineq kajumissutsimik uppersarsaammik allagartaliisarnermik aqqissuussineq aallaavineqarmat.

Naalakkersuisut siunnersuutip itigartinneqarnissaa pillugu siullermeerinermi inassuteqarnerat, annikitsumik aatsitassarsiornissamut pisinnaatitsissummik pigisaqartunik ingerlaavartumik oqaloqateqartarnerit, aammalu taakkua akuersissummik allagartaliisarnermut aqqissuussinermik atuutitsilernissamut isumaat, aallaavineqarput.

Taamatut oqaaseqarlunga Inuussutissarsiornermut Aatsitassanullu Ataatsimiititaliap allanguutissatut siunnersuutaa Inatsisartuni akuerineqartussanngorlugu suliaannngortippara.